

Hiep, hiep, promotie Gladderwiek
Ienakter deur André Rosing

De allerleste en beslissende wedstried van het seizoen veur SV Gladderwiek, oftewel Zaoterdag 1, tegen de eeuwige concurrent de Siepelveense Boys. De promotie is in zicht in dizze derby waar het der hard an toe giet... miestens pas in de derde helft. Wij gaot gien voetbal kieken, maor maakt wel de malaise van de dit jaor nei keuzen veurzitter Gerrit Platje met. Hij had maor ien missie, had e zegd op de algemiene ledenvergadering en dat was promoveren. Platje had al jaorenlang weemoedig alle onhandigheden van de veurige veurzitter ankeken, der kwam ja gien schot in het verhaol. Dat kun zo niet langer... Nou is hij an zet en kan hij metien an zien collega-ondernimmers laoten zien wat e weerd is!

André Rosing

Hiep, hiep, promotie Gladderwiek

Een eenakter over een nei-keuzen veurzitter
en zien trammelant bij de voetbalvereniging SV Gladderwiek

© André Rosing, 2020

Niets uit deze uitgave mag worden vermenigvuldigd of opgevoerd zonder voorafgaande schriftelijke toestemming van de auteur.
André Rosing, Weerdingestraat 215, 7811 CA Emmen, info@getaweb.nl

De personages

Gerrit Platje

veurzitter

Coby Boelens
Bert-Jan Wichers

kantinejuf
official van de KNVB

Decor

*Zijlijn van voetbalveld met reclamebord aan hekwerk waar toneelspelers achter staan.
Op het reclamebord staat naam van hoofdsponsor verkeerd gespeld: Gert Jan Telkamp
CV Instalatietechniek en Zonepanelen*

Eenakter

Scène 1 – De veurzitter

(De voorzitter staat achter het sponsorbord)

Gerrit Kom op Gladderwiek, schöp die bal naor veuren! *(kijkt om zich heen en op horloge)* Verdikkemij, waor blef dat jong nou... Dat is toch gien paass... Kiek toch uut waor of je hen schiet... Lucas stiet vrij... Ja, nou niet meer! Hé scheids, hej dat zien... moej mien bril lenen of zo... Jongs, 't kan nog, nog een half uurtie en dan is 't beslist... tenminste as die ieskop zich iens lat zien. Kop derveur Gladderwiek, bezörg mij die promotie. Hak dat zootje uut Siepelveen underuut. Verrdo..., nee aander kaant op met die bal!

(mobiel gaat en we horen desgewenst de andere kant ook via de speakers in de zaal, maar in een niet verstaanbare taal die mee gaat in de emotie)

Ha moi Gert Jan Telkamp, Gerrit Platje hier... ja ik zie je staon *(zwaait naar de overkant)*. Wat een spanning, dat komt... Wat hej?... Nee dat komt allemaol wel goed... Dat heb ik toch zegd... Toen ik veurzitter worden bin van dizze verening har ik maor ien missie en dat is promotie en dit is de leste hobbel... Nee geliek spel is niet genug, wij moeten winnen van de Siepelveense Boys vanmiddag en dan kuj met mij met op de praolwaogen... Ja, die heb ik al besteld... ja natuurlijk met een groot spandoek dat jij de hoofdsponsor bint... Zo zie je maor daj met mij beter zaaken regeln kunt as met de old-veurzitter, die lamdeling... Ja, het hef je aordig wat kost, maor nou kuj ok van die zunnepanelen bij oens op de kantine gooiën... Dat heb ik je toch zegd, dat geld van je was veur het geheime waopen... Waor die blef? Ja, ik geleuf dat e der zo is... *(rondkijken)*. Alles komt goed. Wat is der met je bord? *(kijkt omlaag naar sponsorbord)*. Ik zie zo niks...

(andere kant heeft opgehangen)

Hef ophangen. Waor blef dat rötjong? *(Weer richting veld)* Nee kiek dan naor links, die met dat rooie börstelhaor lop ja hielemaol vrij... Haol 'm underuut! Schöp hum umver... Harregat, zo hard huufde dat ok niet. Ja heur, geel! Het bint ok van die geweldige anstellerige kneuzen daor uut Siepelveen. Veur zukswat gao je toch niet op de grond liggen te beulen. Och ja en dan een aanloop van hier tot Tokio, nou kop der under jongs... Blijf in je doel... Kom dan uut je doel... Nee, blijf staon... doelpunt... *(via de speakers in de zaal hoor je bij ieder doelpunt gejuich, gebrul, gewanhoop; oh's en ah's enzovoort)* Kunnen wij der ok nog wel bij gebruiken. 0-1 en mien investering is in gien velden of wegen te bekennen *(kijkt nog eens naar tekst op sponsorbord)*

Scène 2 – De veurzitter en Coby met koffie

Coby *(op)* Gerrit, ik heb je wat koffie metnummen. 't Is ja ok zo kold hier an dizze kaant van 't veld. Waorum gao je niet bij je kameraoden staon daor an de overkaant? Je staot hier ja zo allennig.

Gerrit Ze lachen mij nou al uut, maor dat zal ze wel snel vergaon as mien geheime waopen in het spel komt. Waor blef e?

- Coby Alle kerels binnen ok 't zölfde. Mien Tinus was ok zo genieperig en kun ok zo vals lachen toen wij veur de rechter stunden. Maor dat hef e weten, dat stuk ongeluk... Ik heb hum...
- Gerrit Coby hol je koest, ik heb zölf al trammelant genog. Wij staon 0-1 achter op die verrekte Siepelveners. Het kost mij hiel wat muite um te zörgen dat mien bloedeigen zeun Harry, die klungel, in de dug-out blef zitten en een hoofdsponsor die zeurt over zien plek op de praolwaogen en dan hef e ok nog wat an te merken op zien gloedneie sponsorbord. (*kijkt weer naar bord en Coby vervolgens ook*) Vrogger toen de Telkampies nog naost oens woonden, hadden ze al zoveul kapsones.
- Coby Gerrit, je zult zien dat alles goed komt. Ik heb dizze week nao de training pas de kantine opengoooid toen ze allemaol mu en bezwiet waren. En an de bar heb ik nog hiel wat tactieken met ze deurnummen. En je moet het maor zo bekieken, 't is maor een spellegie...
- Gerrit Een spellegie? 't Is oorlog! Wij laoten oens toch niet vernedern deur zu'n dom inteeltdörpie? Zij hebben niet iens zu'n grote supermarkt as wij en ok maor drei rotondes... en wij hebben der maor liefst acht!
- Coby En waarom mag je Harry niet metspeulen? Hij is op tied bij alle trainingen en hij zörcht naotied dat alle netten, de ballen en de pionnegies netties opbörgeren worden in 't hok. De aandere jongens binnen dan al bezig met hun darde fles bier.
- Gerrit 't Is een klungel, dat hef e van zien moe. Ik kan nog beter oeze Ellie opstellen, die is nog meer maans. Gelukkig dat e handig is met de computer en met zien reclaomeopleiding. Zo hef hij dit sponsorbord ok mooi veurdielig veur mekaor maakt. Dat dan wel weer.
- Coby Mien ex Tinus leek ok hiel wat. Toen ik hum net leerde kennen was e al opsteld as doelman hier bij het eerste. Mooi gezicht heur zu'n grote blonde Viking as doelman. Maor het ienigste wat e tegen kun holden waren zien gevulens, tenminste veur mij dan. Stumper!
- Gerrit Och, hielemaol hopeloos is 't ok niet. Ik har je ok ja verteld dat oeze Harry met zien reclaomeopleiding op snuffelstaoge was bij FC Stad. Mooie plek! Daor har e heurd dat de directie op de hoogte was van een geweldige spits, uut Iesland...
- Coby Ik heurde al wel van een neie speuler. Maor...Iesland? Je bedoelt Friesland zeker??
- Gerrit Nee ies, ijs..., IJsland. Zu'n tweebienige spits met het vermogen um te scoren en met diepgang... Nou ja, allennig op het veld dan.
- Coby Gelukkig dat e beide bienen dan nog hef...

- Gerrit Maor ja, bij zu'n grote club giet 't allemaol over de knickers en dat giet langs veul verschillende kaomerties en dat kost tied! Ha!
- Coby Gerrit, waarveur ik ok nog even kwam was...
- Gerrit Hier bij Gladderwiek kunnen wij sneller beslissen en ik bin geliek naor Gert Jan Telkamp gaon. Die was bij de leste vergaodering zo an 't snakken over zien umzet an zunnepanelen en hij is ok niet vies van promotie en veural waor zien eigen dikke kop op stiet. Under het mom van 'veur wat, heurt wat' wol e wel garant staon en zo bin ik met oeze coach geliek met de bus naor Iesland gaon en hebben wij dat kwaojong met een vet contract bij zien moe under de vleugels weghaold.
- Coby Mien breur Egbert zit op een Qbuzz, maor komt niet verder as Schuunsloot. En waor is die stumper nou dan?
- Gerrit Misschien kan hij het hoofdveld niet vinden of lop e te strunen deur de kliedkaomers. As jij hum nou iens gaot zuken en hum direct hierhen brengt. Dat is beter as mij hier een beetie van 't spel afhaolen. Het giet nog lang niet zoas het mot. (*Richting veld*) Hé, je moet daor deurdekken en die leste man afschermen! Meer pressie derop!
- Coby Dat zee mien advocaot ok... meer pressie derop. Ha, dat hef e weten.
- Gerrit (*Richting veld*) Gien ien-tweetje!
- Coby Nee, as der een darde in 't spel is dan stiet der vaok ien butenspel... (*wijst naar zichzelf*) Wat ik ok nog zeggen wil, de slieter stiet der met een krat vol met champagne en hij wil geliek afreken.
- Gerrit Jao, dat is waor ok. (*kijkt in een lege portemonnee*) Eh jao, dat is veur de anstaonde promotie. Hol hum maor even an de praot, nao de wedstried kom ik deran. En zuuk dat jong op!
- Coby Ik gao mien best doen. (*Af*)

Scène 3 – De veurzitter even allennig

- Gerrit (*Richting veld*) Kiek dan toch scheids, dat is een Schwalbe, daor kan e een Golden Kalf veur kriegen. Kiek dan iens naor oeze speuler. Lucas, wat hej? Kruusbanden? Alweer? En dan mot die der ok nog uut... (*richting denkbeeldige dug-out*) Coach, coach, eh trainer... niet mien zeun opstellen! Harry, blief zitten, laot dat voetbal maor an aandern over. Zitten blieven.

(*Mobiel gaat*)

Gert Jan Telkamp!... Dat is toch niet veur te stellen dat zu'n kerel niet een fatsoenlijke wedstried fluiten kan. Veurig jaor hef dat misbaksel al zukke raore beslissingen maakt. Wat zeg jij?... Nee, jij hebt niet betaold um te verliezen... O, lachen ze je nou ok al uut... Alles komt goed!... As oens geheime waopen... Waor of e is? Hij, hij zal der zo wel

ankommen... *(kijkt op het bord en Coby ook, die opkomt)* Ja, Gert Jan Telkamp CV Installatietechniek en Zonnepanelen. *(kijkt nog eens)* Wat bedoel je? Ophangen... Wat veur geknooi? Waor hef hij 't over?

Scène 4 – De veurzitter en Coby weer terug

- Coby Die is rustig, ik heb hum an de bar neerzet met een glas bier.
- Gerrit Wel dan, nee toch niet oens geheime waopen?
- Coby Nee, de slieter. Voetbal hef e niks met, zee hij, maor een glas bier des te meer. En undertussen hef der zuch alweer een aander...
- Gerrit Jij zulden toch op zuuk gaon naor die verrekke Ieslander?
- Coby Maor het is kommen en... nou ja niet gaon van leveranciers. Ik kan toch ok niet alles. Mien ex was ok al zo veuleisend, kende ok totaol gien regelmaot en dan raok ik hielemaol over de kook en dan...
- Gerrit Rustig nou maor, jij gaot gewoon nou direct en rap op zuuk naor oeze neie anwinst. Dat is het ienigste wat je huuft te doen.
- Coby Dat kuj zo wel stellen, maor de slaoger stiet der nou ok met gebaksduzen vol met vleeshappies. Hij wil ok geliek zien geld en zu'n beul van een kerel die weiger je niet zomaor.
- Gerrit Zet hum maor naost de slieter an de bar, dan kunnen ze der saomen even over hebben en as de neie spits straks zien wark daon hef dan komt het allemaol goed.
- Coby Met dizze stand hej die drank en die happies hielemaol niet neudig. Waorum maok je je nou ok zo drok over promoveren? 't Is zo ja ok gezellig.
- Gerrit Coby, daor snap jij hielemaol niks van. Stilstand is achteruutgang! En nou op een draffie op zuuk naor oens geheime waopen!
- Coby Maok je gien zörge, ik zal hum 't veld op schöppen. Ha, ha en de ongedurige leveranciers van je wegholden. *(Af)*

Scène 5 – De veurzitter en Bert-Jan van de KNVB

- Gerrit *(Richting veld)* Verrek, hef e oeze Harry toch opsteld, kan der ok nog wel bij... Harry, schöp 'm veur de voeten; nee niet beGROETEN... Och kerel nog an toe! Waor blef e nou?... *(kijkt weer om zich heen en op zien horloge)*

Bert-Jan *(Op met aktetas met daarin papieren, rekenmachine en reglementsboek, lange jas en bril)* Wie bedoel je? Wus je dat ik der was?

Gerrit Hè? Nee, nee ik bedoelde een aander. Maor ik bin even an 't kieken. An de overkaant kuj het veul beter zien.

Bert-Jan Ik har ok al niet dacht dat je mij zo vriendelijk wil ontvangen. Maor zukswat kan niet stillegies an oens veurbijgaon. Zukke fratsen kommen we gelukkig ok niet veul tegen in het amateurgebeuren.

Gerrit Wat bedoel je man, ik zul niet weten wel of je bint.

Bert-Jan Dan is een veurstelrondtie wel even op zien plaots. Ik bin Bert-Jan Wichers en officieel official van de KNVB, de Koninklijke Nederlandse Voetbalbond. Um precies te wezen van de amateurvoetbal zaoterdag district Noord, afdieling 2. As het goed is hej een brief kregen, maor umdat wij daarop niks heurd hebben bin ik hier nou.

Gerrit Je moet even wachten, want het is bar spannend op dit moment.

Bert-Jan Voetbal kan mij niet zoveul schelen, laot staon amateurvoetbal, want dan giet het ok nog nargens um.

Gerrit Nargens um? Wij staon op het punt geschiedenis te maoken met SV Gladderwiek. De drank en happies bint al binnen, de praolwaogen is onderweg en as oeze neie anwinst eindelijk een keer komt, *(kijkt om zich heen)* dan stiet oens niks meer in de weg veur promotie.

Bert-Jan Al die regelties en cieferties wat je zo bij voetbal hebt, dat sprek mij wel an, maor dat domme geloop achter zu'n bal an... Maor goed, waarveur ik hier kom is...

Gerrit *(Richting veld)* Houw 'm der ien veur, laot je niet piepeln deur zu'n deurgefokte Siepelvener. Bah, ik mag zien rötkep niet lieden.

Bert-Jan Ik zee dus waarveur ik hier kom... Wij hebben je een brief sturd die over je neie anwinst giet of liever gezegd over het deur je betaolde lid uut een ver oord. En as der niet wordt reageerd op een brief van de KNVB, dan kommen wij gewoon langs.

Gerrit Die brief heb ik nooit ontvangen!

Bert-Jan Daorum stao ik hier nou. Ik wil 't hebben over je neie anwinst.

Gerrit Ja mooi hè, zo under de neus van FC Stad vortplukt. Dat numen ze voortvaorendheid en snel besluit maoken. Daor kan menig Eredivisieclub een veurbeeld an nemen. *(Richting veld)* Trek die rötvent umver, niet zo benauwd!

- Bert-Jan Dat is het juist, SV Gladderwiek döt , zoas ik het vanmorgen nog lezen kun, niet met in de Eredivisie, zölfs niet in de Eerste Divisie en dan is het niet toestaon um een betaolde speuler an te trekken. Dat zul oneerlijke concurrentie wezen ten opzichte van de rest van de clubs in district Noord, afdieling 2.
- Gerrit O ja? O... ja maor, nee maor... hij kreg ok gien salaoris heur, 't is gewoon... eh... een reiskostenvergoeding veur... dat e niet teveul kwiet is veur de bus.
- Bert-Jan Die speuler, die komt hielemaol uut Iesland...!
- Gerrit Kuj naogaon wat zu'n reisje wel niet kost.
- Bert-Jan Het giet mij hielemaol niet um Gladderwiek en dat ik ok nog iens hier zölf vandaon kom en gelukkig op tied dit röt dorp achter mij laoten heb. Het giet mij der ok niet um dat ik vrogger altied pest weur deur iene Gert Jan Telkamp en zien buurjonkie en dat ik nooit met much doen met schoelvoetbal, maor het giet hier wel um de regels van de KNVB. Die bint niet zomaor opsteld. Zo van: och laoten we dit maor gaon bedenken en dan kieken wij wel wat ze dermet doen...
- Gerrit O..., Telkamp ken jij ok... en zien buurjonkie... Nee, dat lek mij nou ok niet iets wat de KNVB zul doen, Bert-Jan.
- Bert-Jan Nuum mij maor meneer Wichers of gewoon Wichers. Dat volstiet, wij willen niet te amicaol worden met oeze leden. Zu'n club binnen wij niet, of liever zo 'Bond' maoken wij het niet. Maor, betaolde speulers muggen niet in oes district en oeze divisie. Kiek, hier heb ik het reglement!
- Gerrit Dat begriep ik en ik zee ok tegen oeze hoofdsponsor Tel... Nou ja ik zee tegen hum, wij huuft gien geld veur dat jong, want dat is ok niet conform de KNVB-reglementen, maor wat reiskostenvergoeding dat zullen ze wel goed vinden. Wij willen tenslotte gien trammelant hebben in district Noord...2.
- Bert-Jan Typisch Gladderwieks, maor denken dat dit allemaol zomaor kan. Op oeze jaorvergaoderingen is der nog nooit ien west van Gladderwiek, trouwens der komt hielemaol gienien uut district 2. En even bellen met oeze KNVB-Vraog-Maor-Raok-Hotline is der ok niet bij. 't Is hier ien anarchistische bedoening. Under curatelestelling lek mij veul beter.

Scène 6 – De veurzitter en Bert-Jan ontmoet Coby

- Gerrit Der is toch wel iets goeds an Gladderwiek, toch?
- (Coby op)*
- Bert-Jan Ik zul niet weten wat... *(ziet Coby)* Coby...?

Coby Gerrit, eh veurzitter... der was net iene die naor je vreug... *(ziet nu ook Bert-Jan)* Oh, je hebt 'm al ontmoet. Ik zee al tegen hum, zuuk maor naor een klein driftkikkertie.

Gerrit Elkenien wil wat van mij.

Coby Ik heb je geheime waopen ok vunden. Hij zat in de kantinekeuken op de vloer veur de koelkast met de koelkastdeur wiedwaogen lös te mijmern over Iesland en zien moe, zien husky's en al zien breurties en zussies. Die lieverd hef zu'n last van heimwee.

Bert-Jan Coby is het toch? Ik dacht al dat ik net wat bekends zag.

Coby Jao..., *(wat verheugd)* maor ik ken je niet zo direct. Ok niet van Tinder of Lexa geleuf ik. Tja... En o ja, Gerrit, de slaoger zit inmiddels mooi naost de slieter. Al dat bier komt wel bij je op de kaart, Gerrit. Ik moet mij ok verantwoorden.

Gerrit Niet belangriek, maor heimwee of niet, dan kan e toch wel speulen?

Coby Weet je wel dat je hiel veul last kriegen kan aj heimwee hebt, dat giet gepaard met hiel veul stress... Net zoas dat gieniene zuch drok maakt over regelmaat... laot staon mien ex.

Gerrit Gelukkig heb ik nooit gien last had van stress... *(Richting veld op gestreste toon)* Wacht even, gao even an de kaant... Verrek speel die bal nou af... Ja niet an de tegenstander, hol die kerel tegen... Harry laot jij je maor terugvallen, je loopt allennig maor in de weg... Hol de controle, 't is 'n uitgebroken speuler ... Ik kan 't niet aanzien ... Ja heur, doelpunt veur die verrekte Siepelveners... 0-2.

Coby Het leek mij butenspel...

Gerrit Wat veur verstand heb jij nou van voetbal, laot staon van butenspel?

Coby *(snel)* Een speuler stiet in een butenspelpositie as dizze dichter bij de achterlien van de tegenstander stiet as de bal en de veurleste tegenstander, inclusief de doelman.

Bert-Jan ...Dat kan wel kloppen, geleuf ik. *(kijkt gelijk in het reglement)*

Coby *(Sneller)* De twee leste verdedigers kunnen zowel een normaole verdediger wezen as de doelman. As de speuler op gelieke hoogte as de veurleste verdediger stiet dan stiet e niet in butenspelpositie. Maor een butenspelpositie is niet arg zolang aj de bal maor niet naor degene schöpt. *(Normale toon)* Tenminste... zo warkt het wel bij oens op vrouwenvoetbal.

Gerrit O...

- Bert-Jan *(Verrukt)* Ja klopt. Tenminste volgens document 312a, artikel 41, reglement 613. Maor ja, die regel giet wel weer nao elke algemiene ledenvergaoeding over de kop. De statistieken liegen der niet um as ik...
- Gerrit Ja ,’t is goed. Hoe stiet het nou met oeze Ieslandse vriend? Is der al een beetie kans dat e zo langzaomerhand dizze kaant op komt? De wedstried duurt nog vieftien minuten en der komt ok gien verlenging an te pas.
- Coby Ik mus hum toch allennig zuken? *(naar Bert-Jan)* Toch ken ik je argens van... misschien wel van **het** single-zeilkamp in Balk van veurig veurjaor.
- Bert-Jan Ja, ...eh nou, ’t is ok alweer een toertie leden dat ik hier vortgung.
- Gerrit Je moet derveur zorgen dat e het veld op komt. En dat kan niet lang meer duren want wij staon al dik achter. Trek hum bij die koelkast vandaon.
- Coby Ik gao der geliek wark van maoken. De slieter en slaoger zullen ok wel weer toe wezen an een nei glas. Dat gestress dat is lang niet goed veur mij, ik heb die vechtscheiding nog maor net achter de rug... *(Af)*

Scène 7 – De veurzitter en Bert-Jan praot verder

- Bert-Jan *(Kijkt Coby na en herneemt zich)* Ik wol even weer terugkommen op de overtreding van het hele gebeuren wat betreft de buitenlandse anwinst.
- Gerrit *(Richting veld)* Zet ‘m veur. Gebruuk de briedte van ’t veld... Moej nou kieken, nummer 13 dat is mien zeun, Harry. Aj zukswat rondlopen hebt dan moej toch ok wel op zuuk naor wat aans.
- Bert-Jan Kan wel wezen, maor as wij alles maor toelaoten dan is het hek van de dam. Veurige week nog... toen was ik op bezuuk bij VV Nij Tjalleryp. Daor was ik pas naodat ik vergeefs de eerste helft bij SV Menaldummerbriedte stun.
- Gerrit Altied lastig, Menaldummerbriedte uut...
- Bert-Jan Daor in Friesland lieken die dörpies ja ok allemaol op elkaor en ik har naor de juuste weg vraogd, maor ik ken gien Fries, laot staon begripen as een wei-je en stritje. In ieder geval toen ik eindelijk daor bij Nij Tjalleryp...
- Gerrit *(Richting veld)* Nou kein geloel en hol op met al dat gepingel!
- Bert-Jan Je moet weten dat Nij Tjalleryp bovenan stiet bij oens in de statistieken as het giet um risicowedstrieden.
- Gerrit *(Richting veld)* Schöp hum umver!

Bert-Jan En de veurige keer gung het ok al mis, dikke houwerij in de zeuvende minuut tegen SV Lutjelollum. Ze waren hielemaol mal veur de kop en toen hef de scheidsrechter het spullegie stillegd.

Gerrit *(Richting veld)* Goed zo! Dat vuult e nog wel ankommende week.

Bert-Jan Dus dat was overnei speulen en dit maol zunder publiek. Maakte niet veul uut, normaol komt der ok gienien kieken. Maor het giet um het principe. Zeg, je kantinejuf...

Gerrit ...Coby.

Bert-Jan Ja, zeg maor eh... Coby, hoe zit dat met heur? Har die niet wat met zu'n beul van een doelman?

Gerrit Jao, maor dat is jammer genog over. Daor waren wij knap verdrietig um.

Bert-Jan Vanwege de scheiding...?

Gerrit Hadden wij echt niet an zien kommen.

Bert-Jan Arme Coby...

Gerrit Arme Coby? Nee, die binnen gewoon uut mekaor gaon, dat weur ok tied, altied trammelant. Hij wol nou keepen in 't dörp waor e naor toe was verhuusd. Daor waren wij aordig stuk van.

Bert-Jan Dus Coby is nou allennig?

Gerrit *(Richting veld)* Ach, ach, wat een hotsknotsbegoniavoetbal en dan zuj zien dat Siepelveen ok nog veur 't doel giet liggen en die scheids is gewoon de wedstried kapot an 't fluiten...

Bert-Jan Dus Coby is nou allennig. *(Ziet in de verte de praalwagen aankomen)* Eh, meneer Platje...

Gerrit *(Richting veld)* Harry, gao terug naor je eigen helft. Zij hebben een corner daor! Maor je moet je der niet met bemuien... Gewoon op een afstandie toekieken.

Bert-Jan Platje, is die waogen veur jullie?

Gerrit Wat veur waogen?

Bert-Jan Nou die daor, die der ankomt *(wijst naar achteren)* met dat spandoek *Hiep Hiep Promotie Gladderwiek. Gefeliciteerd namens Gert-Jan Telkamp CV Instalatietechniek en Zonepanelen (spreekt ook fout uit)* Klopt niet.

Gerrit Verduld is die der nou al? (*mobiel gaat*) Gert Jan Tel... (*kijkt Bert-Jan aan*) Moi, Gerrit Platje hier... Ja dat die kar der al is, is wel wat veurbaorig... Maor je moet der wel wat geleuf in blieven holden... Ze lacht je alweer uut?... Maor wij lachen as leste dat weet jij toch... Ja, dezölfde tekst as hier op 't bord stiet hebben wij ok in koeienletters op oeze praolwaogen zet, mooi hè! De kracht van reclaome is natuurlijk herh... Nee, wij hebben hum opspoord en wij binnen hum nou klaor an 't maoken veur de leste tien minuten... Dat wordt zeker tied... Nee dat is iene van de Bond, de KNVB, die wil het spektakel ok niet missen. Nee, je huuft je niet veur te kommen stellen, (*zachtjes*) hij kent je nog... Ja, doe ik ... Wat moet ik veurlezen? Nou veuruut dan maor. (*Kijkt naar bord en spreekt het langzaam net zoals het er staat inclusief de fouten*) Gert Jan Tel... (*kijkt even naar Bert-Jan*) CV Instalatietechniek en Zonepanelen. O... Wat?... Eh nee... dat hef Harry bewust daon. Deur zu'n fout valt dizze meer op as die aandere borden. Speciaol veur je en och, wat stao je der met een mooie foto op... Ja bedankt! (*opgehangen*) En nou mot Coby der rap wezen met die iespegel!

Bert-Jan Daor moeten wij het nog over hebben. Die kan niet opsteld worden, want dat druist tegen al oeze regels in. Maor, even over Coby, hoe...

Gerrit (*Richting veld*) Harregat, een hoge bal veur oens doel. Vang die bal! Nee Harry, niet koppen, blief der vanaf... Nee, niet op je eigen doel koppen, malloot! Ja heur, eigen doelpunt en moej kieken, hij is ok nog bliede... Verkeerde doel! Ja ,wij speulen de aander kant op! (*wijst naar de goede richting*) Nou hef het pas deur. 0-3.

Bert-Jan Ik har het ok veuls te laot deur dat Coby destieds mij wel much lieden, ik har het ok veuls te drok met huuswark maoken en hard vortrennen veur die pestkoppen. Nou en toen kwam Tinus, de beul van een keeper, ok nog in beeld.

Gerrit (*Richting veld*) Tinus har die bal nog wel tegenhouden...

Bert-Jan Oes prille geluk ok... dat rötvoetbal ok!

Scène 8 – De veurzitter, Bert-Jan en Coby an 't ende van de wedstried

Coby (*Op*) Ik heb flink op je neie anwinst moeten inpraoten, ik heb hum verteld dat Gladderwiek ok maor een kold gat is net zoas bij hum thuus en nao een paor dikke cornetto's kwam e toch in de stemming en ik heb hum bij de trainer afleverd. Hij is hielemaal klaor veur de stried.

Gerrit Gelukkig, dan kan het toch nog goed kommen. (*richting dug-out*) Coach, coach... eh trainer, zet hum der geliek in. Ik weet wel ien die je der zo kunt uuthaolen. Wat? Nee nummer 13 kan der uut, niet oeze nummer 14... Nou ja, laot ok maor zitten, het belangriekste is oens geheime waopen.

Bert-Jan Dat kan niet zomaor meneer Platje, ik moet nu echt in actie kommen.

- Coby Ho, ho, wacht even meneer de official. Ik heb al dat gepraot met dat jong niet veur niks daon. En dat giet al niet zo vlot met zu'n vrömde taol.
- Bert-Jan Het spiet mij, Coby...
- Gerrit Ja maor, in het leste bladtie van de KNVB stun een hiele special dat wij oens meer mussen verbinden met aandern, *Verbroedering op het Veld* stun der boven, Nou as dit gien goeie verbintenis is of verbroedering...
- Bert-Jan Dat stuk heb ik zölf schreven en dat giet niet over ankopen in de vrömde, maor over verbinding met aandere clubs in de buurt en daj wat zuniger umgaot met de scheidsrechters.
- Gerrit Ik heb toch niks te maoken met die armoedzaoiers van een paor dörpen verderop. Hier in Gladderwiek binnen wij 't gewoon um verbroedering overver te zuken. Coby, help mij asjeblijft even um die man te overtugen...
- Bert-Jan Der bint regelties en daor moeten wij oens allemaol an holden.
- Coby Ik hol ok geern van regels, maor ken jij mij dan? Wacht even, je komt mij al zo bekend veur. Bert-Jan is het toch?
- Bert-Jan Ja klopt, *(verheugd)* wat mooi daj mij nog kent... Maor Coby, die neie speuler die kan niet metdoen, wij tolereert gien overbetaalde speulers in district Noord... afdieling 2. *(wil op nieuwe speler aflopen)*
- Gerrit En as ik je nou een mooie VIP-plek geef op oeze eretribune. Kuj mooi naast oeze neie hoofdsponsor zitten en Coby brengt je zo nou en dan wat lekkers.
- Bert-Jan Wij hebben een strikt beleid as 't giet over annaome van geschenken. Ik heb zölf de veurschriften hierover op papier zet. Stun ok in 't zölfde bladtie, pagina 21. En daorbij, ik huver al bij de gedachte dat ik hier um de zundag in dit kaolde gat moet zitten.
- Gerrit Bladziede 21? Zover was ik nog niet kommen.
- Coby *(Gaat voor Bert-Jan staan)* Bert-Jan... dat arme jong hef al zu'n last van heimwee en dan wol jij hum ok nog van een spellegie voetbal holden?
- Gerrit *(Richting veld en verrukt)* Daor giet e al, oens geheime waopen! Kiek maor iens goed, rats, rats... En dat allennig maor veur wat reiskostenvergoeding... en verbroedering tussen volkern natuurlijk!
- Coby Waorum mag die niet metdoen?

Bert-Jan Hef te maoken met regelties en vrogger much ik ok nooit metdoen.

Coby Dus dat zit je dwars en nou kom je hier oeze wedstried boycotten?

Gerrit Jao, dwars deur de bienen, en een lobje, stiftballegie, jao kan ok...

Bert-Jan Ik wil hielemaol gien spelbreker wezen, maor...

Coby Gelukkig, ik dacht even dat ik weer zu'n bullebak tegenover mij staon har...

Gerrit Coby, hol je wat in. 't Is wel ien van de KGB...

Bert-Jan KNVB... Het hef allemaol te maoken met regels en as wij dat maor zo zien gangegie laoten gaon dan wordt een hiele toestand.

Coby Hej geliek in, wat regelmaat zörgt derveur dat alles goed blef lopen. Maor je kunt het ok zien as een mooie verboedering tussen Gladderwiek en Iesland. Daor kan gien geld van winnen.

Gerrit Uuthaolen en pats mooi in de kruzing, 1-3. Joohoo hatsikidatsie. *(maakt sprongetje)*

Coby *(Vliegt Bert-Jan in de armen)* Kiek dan toch, hij scoort, mien kleine Eskimo!!!

Bert-Jan *(Reageert verlegen)* Op Iesland hej volgens mij gien Eskimo's, maor hij kan wel mooi speulen en ja, zo krieg je hiel wat verboedering. *(houdt Coby nog steeds vast en kijkt haar aan)*

Gerrit En deurgaon! Goed zo, leg zölf de bal maor op de middenstip, scheelt weer tied. En pak die bal af. Zo ja! Mooi een achterwaortse paass van oeze libero naor de iesbreker, wat een afstandsschot, te mooi um naor te kieken. Jammer, paol! Pak 'm terug, mooie assist, fraaie hakbal, klats, klats, een lobje GOAL en 't is 2-3. Mooi daon, mien jong, good job my boy eh... *(pakt zakwoordenboekje)* Vel Gert Drengur, ofzo...

Coby *(Merkt niets van doelpunt)* Ik wus niet dat jij zo gespierd bint, Bert-Jan.

Bert-Jan Ik zit al jaoren bij oens op de taofelvoetbalclub SNEU.

Coby Zo sneu is dat niet, heur.

Bert-Jan Nee, SNEU stiet veur Saomen Net Even Uutblinken.

Coby Saomen, dat zul mooi wezen.

Gerrit En op 't veld lop ok alles goed. Yatzee! Oeze verschrikkelijke sneiman hef via een weergalozе crosspaass de bal alweer in bezit. (*richting veld*) Harry, loop die man niet in de weg. Links, rechts, links, tweebienig... zee ik al en dan nog een schienbeweging derbij, hiel Siepelveen stiet nou in de 16 meter, de angsthaozen. Een punter en... 3-3. Nog ien en dan kuj 't spullegie op de praolwaogen gooien, Coby!

Coby Duur jij mij dizze keer wel met uut te vraogen?

Bert-Jan Of wus jij dat...

Coby Allang, ik har die brief die je stuurd har mooi bij mij holden en zo wus ik dat je langs zulden kommen.

Bert-Jan Jij verwachtte mij al?

Gerrit Zeg torteldoefies, gao even argens anders staon. Het giet der nou um.

Bert-Jan Je geheime waopen lig aans wel wat gek zo op het veld. Wat hef e?

Coby As dat maor niet de heimwee is. Misschien moet ik nog wat cornetto's der bij haolen.

Gerrit (*Richting veld*) Wat hef e? Gao staon, stand upheug, steh auf (*pakt zakwoordenboekje erbij en zoekt naar juiste woord*) Standa upp... Coach? Coach, coach... eh trainer? Trek hum umhoog!

Coby Het lek wel of hij het benauwd hef.

Gerrit (*Richting veld*) Wat zeg je coach? Overhitting?

Bert-Jan Ja, dat kan. Overhitting, dat is een algemiene kwaol bij Ieslanders in de vrömde. Die mensen kunnen moeilijk van de warmte afkommen.

Coby Gelukkig, ze haolen hum van 't veld, kan e mooi even bijkommen.

Gerrit (*treurig*) 3-3. Wij waren der zo dichtbij, nog ien minuut. Coby, je moet maor alles afbestellen. Kiek, daar kommen die Siepelveners alweer an, hun doelman lop ok met naor veuren, moej ze iens mal zien lachen, bah! En mien zeun stiet nog steeds bij de middencirkel. (*Richting veld*) Oe harregat, een veurzet! Gelukkig, oeze neie keeper hef 'm te pakken. Nee nee, niet naor Harry schieten, gewoon opbouwen! Hij ziet niet iens de bal ankommen, maor stiet daar maor wat...

- Bert-Jan Ik wol dat ik vrogger wat meer duurde, ik stun daor ok maor wat...
- Coby Maor misschien duur jij nou wat meer?
- Gerrit *(Richting veld)* Verrek, oeze Harry hef de bal... lopen! Harder lopen! Nog harder lopen! *(Loopt mee in de richting)*. Nee Harry, niet stilstaon, niet achterum kieken, zölf doen! Der stiet gienien in de weg, 't Is een leeg doel!
- Bert-Jan En dan stun die beul van een keeper ok nog in de weg.
- Coby Der stiet nou niemand in de weg.
- Gerrit Deurgaon, der stiet niemand in de weg! Hol de controle... Niet te hard schieten... oei tegen paol an... nog een keer... verduld tegen de lat... hij wil al teruglopen. Nee Harry drei je um, je mag nog een keer schieten! Kreg e de bal ok nog tegen de rug an! Die ketst wel mooi de goeie kaant op. Och, de keeper is der vlakbij... Hij, hij, hij zit!!! 4-3. Affluiten! *(fluitsignaal klinkt)* Jao, wij binnen promoveerd! Mien zeun! Hej dat allemaol zien, 't was mien eigen zeun! Ach, ik heb het ja altied al zegd, wat lek e toch op zien pap! *(Pakt zakdoek erbij)*
- (In bovengaande tekst van Gerrit gaat Bert-Jan in dezelfde tempo toenadering zoeken tot Coby. Dus eerst twijfelen dan voorzichtig op Coby af, maar bedenkt zich en doet paar stappen achteruit, nog een poging, draait nog een keer om en dan tikt Coby op zijn rug en dan is het raak)*
- Coby *(Herneemt zich)* Woj even methelpen, Bert-Jan, dan zetten wij de drankies en de happies op de praolwaogen.
- Bert-Jan Dan gaon wij mooi metrieden en dan wil ik hiel mooi Gladderwiek ok weer iens zien! *(Coby en Bert-Jan af)*
- Gerrit *(Emotioneel, even stilte)* Hiep, hiep, promotie veur Gladderwiek!

Einde